

Sul altâr di Aquilee il misteri de nestre storie

Aquilee, ai 17 di lui dal 2005

Mi àn clamât a dî dôs peraulis in cheste messe di avôt e no sai di ce bande tacâ. No pal fat che no sai ce dî, ma pal fat che no sai se o rivarai a dî dut ce che il lûc e il moment a disin e a meretin.

Aquilee e je come un grant poç di aghe, là che plui si va in nsot e plui glaçade e je l'aghe. Chê aghe che e à ristorât la sêt di gjenerazions e gjenerazions. Come cu l'aghe dal poç, cun Aquilee no si rive mai a dî dut, di tant feconde ch'e je cheste risulitive. Aquilee e je come une miniere che si sprofonde tal timp e te tiere. Plui si va in dentri e plui si intivisi in tesours che no si cjatin di altris bandis. Cirîn, usgnot, di jentrâ spiritualmentri in cheste risulitive di aghe vive e in cheste arcje di minerâi prezios.

Denant di chest sflandôr di basiliche, cjalant chestis colonis, chescj trâfs, chescj mûrs fodrâts di storie e di art, chest pavement museâl che nus vierç, midiant di une simbologjie rifinide, i misteris dal ream di Diu, si sintisi piçui. Parcè che ogni cuadrel, ogni tassel, ogni clap, ogni modon al fevele al nestri voli e al nestri cûr. Denant di tante storie e di tante glorie tu ti sintis piçul, parcè che culî tu contempris secui e secui di liendis bielis e brutis e tu viodis a passâ lis gjenerazions cui lôr fastidis. Tu ti sintis piçul ma no umiliât, parcè che tu ti sintis ancje tu part di cheste storie e di cheste glorie. Ancje tu ti ti sintis un clap, un modon, un tassel museâl di cheste glesie spirituâl ch'e je la nestre Aquilee, glesie mari di glesiis. Ripetint lis peraulis di pre Checç, o podin dî che “ognun di nô al à in sé un toc di Ermacure e Furtunât”, ma ancje che ognun di nô al à o al è un toc di cheste basiliche. E chest ti fâs sintî a cjase. Al è come tornâ tal propi aiar natîf, tal propi grim spirituâl, te proprie aghe. Al sucêt cun Aquilee come cu la mari e il pari, che nissun no si sint forest ma ducj fîs. Chest lu dîs no par volê tornâ indaûr, tune forme di regression pericolose oltri che impussibil, ma parcè che l'arbul nol cres cence lidrîs, come che il pes al mûr cence aghe. E, gambiant aghe, al gambie savôr. Cheste maternitât di Aquilee e paternitât dal patriarcjât, soledut di chel ecclesiastic, e je palesade ancje dal ricuart afetuôs e, o volarès dî, braurôs che a sintin par Aquilee chei che si son slontanâts o che a son stâts taiâts fûr par resons di paronance politiche o religjose. Par solit nissun nol à voe di ricuardâ il timp de sotanance e al è za ben se si contentisi de rimozion impen di passâ a l'ostilitât nude e crude. Poben i fîs nassûts, cressûts e madressûts a l'ombrene de basiliche mari e nudrîts cul so lat spirituâl e culturâl a àn un ricuart positîf di chel timp e di chel lûc. E nol è un câs che, in cheste stesse setemane, martars 12, propit culî l'arcivescul metropolit emerit di Lubiane e prefet de congregazion pai religjôs, bons. Franc Rodè, al vedi butade l'idee di une grande sinode di dutis lis glesiis locâls che tai secui a àn fat part de metropolie aquileiese.

Cjalant e pensant a chest sflandôr di basiliche, che e rive a relativizâ il timp fasinti sintî secolâr e contemporani, mi vegnin tal cjâf lis peraulis che Gjesù al à dit ai fariseos che lu invidavin a fâ tasê i dissepui osanants: “Us dîs che se a tasessin lôr, si metaressin a berlâ i claps” (Lc 19, 40). E chescj claps pardabon a berlin e cun vôs fuerte, plui fuerte dai secui e des prevaricazion dai tancj nemîs che si son butâts come sanglârs cuintri di cheste vigne dal vignâl di Diu a talpassâ, a fiscâ, a robâ, a fâ sparî parfin il non, dopo di vê fat sparî il contignût. Chestis colonis, chestis pieris, chescj mosaics, chestis pituris a cjantin la glorie di Aquilee e la feconditât di cheste glesie, mostrant a ducj, cu la ricjece de sô simbologjie, lis perlis raris de sô teologjie. Mi riferis a la veretât straordenarie dal *descensus in inferna*, di Crist che dal alt de sô divninitât al sprofonde te busate plui fonde e scure de umanitât, travanant i secui e passant fûr par fûr i timps, i fats e lis personis. Mi riferis a la veretât consolant de salvece universâl, tant dibatude o contestade in chescj timps di fundamentalisim religjôs ch'al cjape pît ancje là che no si disarès o si volarès. Nissun nol à dit che l'om al è perfet, come che nol è perfet il mont. Il sens dal pecjât, dal disordin, dal mâl imperant tal mont lu vin sot i vôi ogni dì. O disìn però che, par grant ch'al sedi il còl di miserie e di tristerie, la

gracie di Diu e la sô misericordie a saran simpri plui grancj e a rivaran, come te rêt butade tal mâr, a pescjâ cualunche pes, di cualunche dimension e profunditât.

Ma se i claps a cjantin la glorie di Aquilee, la sô liturgjie, il so cjant, la sô teologjie, il so tesaur di santitât, a berlin ancje cuintri di chei ch'a àn sfogade la lôr rabie cence culumie di tristerie e di fantasie. Fra i nemîs di Aquilee, no podin no vê indiment usgnot chel pape, Benedet XIV, che ai 7 di lui dal 1751, cu la bole *Injuncta Nobis*, al à sdrumât par simpri e di fonde fûr une sente patriarcjâl antighe come la sô, ridusint cheste basiliche a une glesie plui puare di cualunche glesie di paîs, vadî cence batisteri, cence plevan, cence furniment, metude sot l'autoritât di une badesse e cul capelan des muiniis come predi funzionant. Robis che, par solit, lis fasevin i comuniscj vies pes Russiis o in Cine o in Albanie. Par dî che la prepotence gleseastiche no je mancul triste di chê politiche, parcè che il podê al è simpri diabolic, soredu cuant che al è assolût.

Cun dut a chel, mi ven tal cjâf un'altre pagjine dal vanzeli, là che i doi oms vistûts a blanc ur domandin a lis feminis spauridis e avilidis: "Parcè cirîso framieç dai muarts ch'al è vîf?" (Lc 24, 5). Chi no sin tun lûc muart, ma vîf. Vîf pe sô storie, par chel ch'al à savût parturî, pe sô origjinalitât e gjenialitât, par chel ch'al à semenât tes tieris di chest part d'Europe di mieç che e à ancjemò tant ce dî e ce dâ a l'Europe dai popui e des culturis, par chel che al è stât semenât ma soredu pal sanc dai martars ch'a àn bagnade cheste semence. Aquilee e vîf parcè che lis tieris dal patriarcjât no àn dismenteade la sô lezion né dissipade dal dut la sô ereditât. Parcè che nô o sin chi, usgnot, a celebrâ e a fâ memorie. Parcè che nô o sin fîs di chel Signôr ch'al è muart e al è resurît e ch'al è il Diu de vite e no de muart parcè che ducj in lui a vivin. Ducj e dut. Fintremai che nô o tramandarin la memorie di cheste realtât, Aquilee e continuerà a cjantâ il so cjant. "Nol è impuartant il numar di chei che a confessin, ma che cualchidun al confessi" al à scrit il martar e teolic todesc Dietrich Bonhoeffer.

La glesie catoliche e celebre chest an l'an de eucaristie. Par dî la veretât, chestis "anadis" de eucaristie, dal rosari, di chel e di chel altri nol è che mi plasin masse. Mi dan l'idee plui di slogan che di sostanza. Ancje pal fat che l'eucaristie no je di chest an né dal an ch'al ven ma di ogni an e di ogni moment de storie de glesie e dal mont. Parcè che e je l'eucaristie, la grande laude di Crist che al presente al Pari il so amôr e il so dolôr a remission dai pecjâts dai oms e dal mont, ch'e ten sù dut. Cence eucaristie nol è nuie. Poben, in cheste messe di avôt, par chel grant misteri che nus fâs jessi contemporanis a Crist che si fâs nestris mangjâ e nestri bevi e lu fâs nestri contemporanbi e comensâl in gracie dal sacrament, mi plasarès meti usgnot sun chest altâr dute la nestre storie cu lis sôs pagjinis gloriosis e dolorosis, cun dut ce ch'al è stât di bene di mâl in chescj secui. Come che o metin il nestri pan e il nestri vin, cussì o metin la int che e à operât, scombatût, sperât, berlât, vajût, gjoldût in chest timp e in cheste tiere. E lis animis dai sants de nestre glesie, cui lôr merits, ma ancje lis animis dai pecjadôrs di cheste tiere cu lis lôr macacadis e cui lôr misfats. E ancje il nestri popui, cul so còl di ben e di mâl, di credits e di debits. No sin miôr di chei altris, ma nancje piês. No sin cence colpe, ma no sin nancje chei ch' a àn fat plui damp su la tiere. Forsit lis vin plui cjapadis che tornadis, ancje se un piçul al po diventâ prepotent cun tun altri plui piçul di lui, come nô tantis voltis cui fradis slovens. I nestris pecjâts, come ducj, a son plui di omission, tal sens che no vin vût simpri chel coragjo e chê coerence che il vanzeli nus domande e nus comande. Po stâi che ancje nô, usâts a tante puaretât e a tantis liendis, si sedin lassâts inceâ e comprâ de bondance e de massepassudèrie, che no nus à zovât e no vin fate chê figure splendide ch'o vevin savût fâ in tims calamitôs.

Cheste eucaristie e vûl jessi ancje une laude pal fat che o sin ancjemò culî, a contâle. E une domande di jutori al Diu dai nestris paris par ch'al compagni il viaç di sigûr no facil dai nestris fîs e nevôts viers di chê tiere de promesse che e sta denant di nô e che e segnarà la fin definitiva di cheste dispersion gjeografiche, temporâl e culturâl che si cjatìn a vivi.

Mi permet di ricuardâ, culî e cumò, un fat poersonâl. O soi rivât, cuintri di ogni prevision, a corant'agns di messe. Dal 1965 o soi saltât fûr dal seminari cuntun grant bagai di dogmatiche, plui o mancûl ben fate, e cun tantis teoriis. No savevi né là ch'e jere né ce ch'e jere Aquilee. Nus vevin fevelât di dut, dal gial e di sô mari, nus vevin menâts par ducj santuarfis, ma no vevin mai vût indiment Aquilee e la sô storie. Se o soi culî, se o soi cussì, o ai di ringraziâ pre Checo che mi à fat cerçâ il lat di cheste mari e mi à fevelât di cheste perle prezio se e di chest tesaur platât tal cjamp de nestre storie e de nestre memorie. Un tesaur che, usance il vanzeli, al conven vendi dut ce che si à e butâ vie dut ce che si sa par comprâlu. O soi culî, usnot, cun vualtris a ringraziâ chês animis buinis e sapientis ch'a àn tignude impiade, in timps no facii, cheste lum. O speri, fin che Diu mi darà flât e fuerce, di continuâ a fevelâ a ducj chei che o incuintrarai tal gno ministeri e tai miei contats personâi, di cheste grande ricjece, di cheste risultive straordenarie, di chest arbul ospitâl.

O finis ricuardant trê tocs ch'o vin let o cjantât in cheste liturgjie de peraule.

Il prin al è gjavât fûr de profezie di Ezechiel te prime leture. “Fî dal om, puedino tornâ a vivi chescj vues?” “Signôr, gno Diu, tu lu sâs dome tu” (Ez 37, 3). Tornaraial a vivi il Friûl? Lu sa dome il Signôr. Al è lui ch'al sa cuant che lis personis e i popui a nassin e cuant che a muerin. A nô nus sta dî no murî, di restâ in vite, di cirî ce che nus jude a vivi.

Il secont al è gjavât dal salm interlezionari. “Se il Signôr nol fos stât de nestre bande – Israel al po dîlu – cuant che i oms nus plombavin cuintri, cu la rabie che ju scjaldave glotûts vîfs nus varessin” (Sal 123, 2). Cjalant a dutis lis montanis de nestre storie, a dutis lis palissis che cjaçadôrs di ogni fate e di ogni malicie nus àn tindût, al ven propit di berlâ: “Al è il Signôr il nestri jutori, lui ch'al à fat cî e tiere” (v 9).

Il tierç al è il plui curt ma il plui impuartant. Lu rigjavi dal vanzeli di Luche apene proclamât: “O salvarês lis vuestris animis cul tignî dîr” (Lc 21, 19).

A laude e glorie di Crist e dai siei sants. Amen.

Pre Antoni Beline